



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

Tir Yimyim

tiryimyim@aolima

tir yimyim

TAPAK 8

Constitution tamendakdak sorkari amaker: Kcharge

Season tembangba sülen Klopp-i Liverpool toktsütsü



VOL. XXI NO. 104 (ADOK 104) DIMAPUR

KÜPTOKNÜ (SATURDAY)

ANJETI (JANUARY) 27, 2024

₹ 5.00

## Nagaland nung 75 buba R-Day amongdang Naga yimten latettsü ayongzük

**Kohima, January 26, 2024 (TYO):** Nagaland nung tanü 75 buba Republic Day amongdang tekaraba nung Naga yimten latettsü aser linük nung state tajungtiba rongnung ka akümtsü atema asentenshir inyaksü ayongzükogo.

Secretariat Plaza, Kohima nung state level benjung amongdang Governor La. Ganesan-i linük wako sala aser marching contingents 16 nungi salute agia liasü.

Governor Ganesan-isa nisung balala nem awards aser commendation certificates lema agütsü aser sorkar department temi lapokba exhibition stalls lapoktsü.

"Asenoki linük den külemi iba tepela benjung amongdang nüjiso atema rarartem aser taküm bendanga agütsürtemi asentzü sena, timtema aser bendanga agüja küm noklang aika bendangeri yimsü süa aruba nungi asenok nüjiso ngudaktsüba bilemteter" ta Ganesan-i ashi.

Tesüiba küm 75 tashi India linüki asen Constitution nung lateta aliba ama tesayuba, alizüing aser tangatetba nung azüiter arur, ta pai ashi.

"Terenlok tsütsü asenoki mapa tulu inyaktetogo aser iba ajanga tanü alima nung tashitait linüktem rongnung asenok züngsema lir" ta Ganesan-isa metetdaksü.

**Naga yimten tebilemtsü & Eastern Nagaland:** "Nagaland ya küm 60 tejakdang aküm aser asen sobaliba, maitsü aser taginüba kümzüka ayutsü atema Constitution nung arlla lateta lir. Asen linük renlokba aser tejakleni aoba nung Nagaland-ia shilem agia arur, ajisüka Naga yimten tebilemtsü ajanga asenoki tetsükdaksü ajuruba asenoki meteta lir" ta pai ashi.

"Iba tebilemtsü dak sendaka alir ajaki lemet ka agütsü atema kanga dang meranga arudar. Ozü sorkari tekaraba nung yimten latettsü atema tejangra nung inyaka arur. Anungji ni sendaka alir ajak dang mangatettep toktsütsü aser külemi longjemer tekaraba nung yimten latettsü atema merangsü mepishir" ta Nagaland Governor-isa ashi.

"Nagaland putiotsü aser

alinük dak sendakba ajanga Eastern Nagaland ama tesem kari infrastructure o socio-economic parameters tsütsü tangar memenep lir. State aser Centre sorkari iba tebilemtsü angateta lir aser rongdak nüingdak ta angateta inyaksü tenangzükba lir" ta pai ashi.

Department of Under Developed Areas (DUDA) ajanga Eastern Nagaland nung UDAP aser BADP kübok tongtipang mapatong aika inyakogo, ta Ganesan-isa ashi.

PM-DevINE programme kübok Eastern Nagaland nung Rs 180 crore indang Livelihood Projects inyaksü aser iba ajanga terenlok angutsü ta paisa shisem. **ULB elections:** Nagaland Legislative Assembly-i tawa tu Nagaland Municipal Act, 2023 agizükogo aser iba ajanga state sorkari tekaraba nung Urban Local Bodies elections agitsü, ta Governor Ganesan-isa ashi.

**Gari lenmang-Foothill Road atema Rs 9000 crore:** Kümtem süia arudang Nagaland nung gari lenmang tajung yanglua arudar. PMGSY, North East Special Infrastructure Development Scheme, North East Road Sector Development Scheme, Inter State Connectivity, Economic Importance, Central Road Fund aser tanga State schemes kübok Nagaland nung gari lenmang kilometres 980 tajungba kümdaktsüogo aser kilometres 240 nung repair works inyakogo, ta pai metetdaksü.

2020-21nungi Scheme of Special Assistance to States for Capital Investment kübok gari lenmang kilometre 944 tashi yangluogo ta Governor-isa ashi.

"Onoki Foothills Road (Trans-Nagaland Highway) yanglutsü atema maparen inyakdar aser iba atema DPR ka renemogo. Foothills Road ya Rs. 9,000 crores endoka kilometre 364 yanglutsü aser DPR ji Ministry of Road Transport and Highways dang tekaraba nung sen agütsütsü shiogo" ta Ganesan-isa metetdaksü.

**Drug Free State:** State sorkari drug free State akümtsü tenangzükba lir aser iba atema

'War on Drugs' campaign tenzükogo. District ajak nung Anti Narcotics Task Force lapokogo aser Drug networks anema mapa inyaka arudar, ta pai ashi.

**Power & Industries Sector:** Power Department-i Hydro Electric Projects (HEP) ana yangludar. 42 MW Lower Tizu HEP aser 24 MW Zungki HEP atema Asian Development Bank dang sen meshiogo. 24 MW Tizu Valley HEP yabo Externally Aided Projects kübok senotsü teyari meshiogo, ta Ganesan-isa ashi.

Department of Industries & Commerce-i Longnak, Changtongya aser Pfutsero nung Modern Aggregation Centres lapoktsü. Külen Meluri nunga Integrated Warehousing and Distribution Centre lapoktsü.

Industries & Commerce Department-isa District Industries Centre Complex, 6th Mile, Sovima, Chumoukedima nung 'Unity Mall' ka yangludar. Iba ya Scheme for Special Assistance to States for Capital Investment kübok inyaker, ta Governor-isa metetdaksü.

**Nagaki City, Chathe:** Sorkari Nagaland kübok Chathe valley, Chumoukedima District nung mezüingbuba planned modern city ka yanglutsü aser iba dang 'Nagaki City' ta ajatsü. Iba atema Ministry of Housing and Urban Development den jembitepogo, ta paisa ashi.

**Higher Education:** Nagaland University-i state nung aliba college ajak nung academic session 2023-24 nungi Four Year Undergraduate Programme tenzükogo. PMUSHA Scheme kübok Diploma Institutes 3 Degree Engineering College akümtsü Centre dangi benogo, ta Ganesan-isa ashi.

"Onoki Centre sorkar den Nagaland nung Indian Institute of Science Education & Research ka lapoktsü atema jembidar. Iba atema Chumoukedima district kübok Sukhovi yimtsüing nung ali acre 200 shi alizükogo" ta pai ashi.

Nagaland nung mezüingbuba Medical College- Nagaland Institute of Medical Sciences & Research October 14, 2023 nü lapokogo aser mezüingbuba MBBS students batch class agia arudar, ta Nagaland Governor-isa ashi.

Central Quota kübok Nagaland-i MBBS menden 40 shi lemzüka liasü saka asen medical college lapokba ajanga MBBS students 100 zündgar, ta paisa shisem.

Külen, Mon nunga Medical College maparen kanga junga odar, ta paisa ashi.

**Digital Agriculture Mission:** Digital Agriculture Mission kübok Directorate of Agriculture nung Centralized Command Centre ka amenokogo aser iba ajanga Drone Technology, IoT, GIS & Remote sensing maparen inyaker, ta Ganesan-isa ashi.

Pradhan Mantri Awaas Yojana Gramin (PMAY-G) kübok ki 9,500 tema renemogo aser Department-i tanüingba ki tan financial year matemdangsa tembangba yanglutsü nükjidong lir, ta pai ashi.

**Tourism:** Sorkar aser nijatem külemi yaritepba ajanga Nagaland ya tourist temi kanga sapua semdangba tesem ka kümogo. Australia nung akhümket osangkaket Sydney Morning Herald ajanga 2024 nung 16 most exciting tourist destinations shimetba rongnung Nagaland densema lir, ta Governor Ganesan-isa metetdaksü.

Anogo 10 nü Hornbill Festival

2023 nung nisung 1,54,000 aden aser iba nung foreign tourists 2,000 tema aser domestic tourists 37,000 dena liasü, ta pai ashi.

**Sports & Music:** Saisapongbaren Nagaland-i jenjang aika tongtetogo aser national & international events nung takoktem ngutetogo.

Tawa Department of Youth Resources and Sports-i prefabricated multi discipline sports stadiums 5 lapokogo aser ano iba mesükba mapatong 11 teinyakdak lir ta Governor-isa ashi.

"Sorkari sports infrastructure projects aika inyakdar aser item rongnung tongtipang kaji NAPTC, Chumoukedima nung FIFA standard international size synthetic turf football ground yangluba lir" ta Ganesan-isa ashi.

Nagaland sorkari national and regional asayamong balala ayongtsü sentong lir aser March 2024 nung North East Olympic Games aser küm tatemlen Asian Belt & Traditional Wrestling Championships ayongtsü, ta pai ashi.

Nagaland nung February 1-3 tashi Asia Music Summit amongtsü aser iba ya linük nung music expos tulutiba rongnung ka asütsü. Iba sentong nung linük 15 tema nungi nisungtem arua adentsü, ta Nagaland Governor-isa ashi.

Item terenlok ajak ya sorkari nübortem dak rangloker policy balala yanglua inyakba den talisa Nagaland nung alirtemi yaritepba ajanga lir, ta Ganesan-isa ashi.

"Asenok ajaki ozüing sülen anidakertem aser linük nung tebilemtsü abenba senso tajung kaka kümdi aser asenoki kanga meimba Nagaland ya linük nung state tajungtiba rongnung ka akümtsü merangdi" ta Nagaland Governor Ganesan-isa ayongzük.

## 75 buba Republic Day 2024 nung sempet balala angurtem

**Kohima, January 26, 2024 (DIPR):** Parade Ground Secretariat Plaza, Kohima nung 75 buba Republic Day amongdang Nagaland Governor La. Ganesan-i tsüinglanglen agüja alirtem nem award balala lema agütsü.

**President's Medal for Distinguished Service (Police) announced on the occasion of 75th Republic day celebration 2024:**

1. Rupin Sharma Director General of Police Nagaland.

**President's Medal for Distinguished Service (Home Guards & Civil Defence).**

1. MedozhaliePienyu, Deputy Commandant General, Home Guards & Civil Defence.

**Police Medal for Meritorious Service**

1. Peter Shuya Angami, SDPO, Nagaland.  
2. Toshimongba Imchen, ABSI, Nagaland  
3. Archer Phyobemo, ABSI,

Nagaland.

**List of awardees of Governor's award on the occasion of Republic day Celebration 2024 (announced on Independence Day 2023):**

1. Kathyinla, EAC Noklak.  
2. Meripeni, Additional State Protocol Officer Home Department (GAB-II)  
3. Vikashe Chuse, Dy. SP Nagaland (Lokayukta)

**Award of Governor's Gold Medal (Announcement only)**

1. Dr Sentitula IFS Divisional Forest office Mokokchung.  
**Governor's Commendation Certificate.**

1. I. Changsang, Under Secretary IDAN.  
2. C. Chhilliam Khiam, ASI Women PS, Tuensang.  
3. Limitsung Sangtam, District coordinator (PMMVY) Kiphire.  
4. Puleno Neikha, Sports Coach (Sepaktakraw) Youth Resources & Sports Department

5. Bokavi Achumi, UDA ADC office Pughobto.

6. Ruyoseyi, Office Peon Directorate of Agriculture.

**President's Police Medal (PPM) for distinguished service.**

1. Etsimongo Nugullie IPS (Rtd.) DIG (Range) Mokokchung.  
2. Imcharenla, IPS (Rtd) DIG NAP Kohima.

**Police Medal for Meritorious Service**

1. Kilangyanger Walling, NPS, DCP, Niuland.  
2. Israel G. Xuvi, NPS, Dy.Comdt./ CSTF.  
3. Abel Jonsuo Humtsoe, Inspector (INT)

**Award of Union Home Minister for Excellence in Investigation.**

1. Tulakha, K. Sumi, NPS, Addl.SP/ V. Principal, NPTS CMD.

75 buba Republic Day benjungmong nungsa Sano Vamuzo nem Padma Shri Award agütsüba osang metetdaksü.

## Nakmati lendong nung nisung 6 asü; 4 yiru

**Dimapur, January 26, 2024**

**(TYO):** Brihostibar nikongdang 2:00 ako meta Wokha kübok Bhandari sub-division nung nakmati atudak ka nung lendong ataloka nisung 6 rongset aser 4 kanga mejungi yirua lir.

Iba lendong ya Ruchayan nung atalok aser nakmati atudak 'mechanical failure' ka ajanga mi adoka apok aser anentsüh alu. Iba lendong nung asürtem aser yirua alir ajak ya Sarupathar, Assam nungi lir ta Wokha police-i

Lendong nung yiruba nisung 4 ji Dimapur nung mozü ki kati arua lir aser parnok kanga mejungi lir ta osang angazüker.

Mezüingbo anentsüh ajanga lendong atalok ta osang angazük saka bushitepa aodang mi adoka lendong atalokba osang jangjaogo.

Tasürtemji Majibur Ali, Kamal Chetry, Bishal Thapa nunger den maitsü mejangjatetba nisung 3 liasü.



# State kübok tesem balala nung 75th Republic Day mungogo



DIMAPUR



MOKOKCHUNG

**Dimapur, Aenjeti/January 26 (TYO):** India linük tesem ajunga den külemi Nagaland nunga January 26, 2024 nü tesem balala nung 75th Republic Day munga liasü.

**MOKOKCHUNG:**

Mokokchung nung 75th Republic Day ya Imkongmeren Sports Complex, Mokokchung nung among, kong Minister, PHED & Cooperation, Govt. of Nagaland, Jacob Zhimomi-i linük nisan sala aser Republic Day Speech zünga ashi.

Iba sentong nung Minister Jacob-i Poetry Writing Competition nung takok angur Sentinaro Jamir aser Odichung Jamir nem Certificate of Merit agüja liasü. Iba tetoktepba ya Beti Bachao Beti Padhao, Mokokchung ajanga "United Invest to Prevent violence against Women and Girls" omen nung ajemdaker 16 Days Activism against Gender Based Violence nüngtem nung ayongzüka liasü.

Iba anogomung March Past nung Parade Contingents toku - DEF Mokokchung, 2nd NAP Alichen, 13th NAP (IR), Home Guards, Ex-Servicemen, NCC Fazl Ali College, NCC Mayangnokcha GHSS, Bharat Scout & Guides aser 2nd NAP Pipe Band nungi shilem agi aser Parade Commander, Benrio Shitio, Asst. Commandant 2nd NAP, Alichen aser Mangjai Phom 2nd in Command liasü.

Iba sentong nung

Mokokchung District Martial Arts Association ajanga Martial Arts Demonstration sayu, Mopungsanger Ola, Ungma Village ajanga sobaliba yimya balala agi shilem agi, Ladies Club, Mokokchung aser Lady Officers, Mokokchung tsünga arr atsütepba liasü. Iba sülen Minister Zhimomi-i Exhibition Stalls lapoktsü.

Iba anogomung nung shilem ka ama department balala aser NGOs temi District Hospital aser District Jail semdanga liasü.

**DIMAPUR:**

Dimapur District administration den Dimapur nung aliba nüburtem 75th Republic Day sentong DDSC Stadium, Dimapur nung munga liasü, kong Deputy Chief Minister, Planning & Transformation and National Highway, T.R. Zeliang-i National Flag salatsü.

Pai march past contingents semdang aser Rashtriya salute agia liasü, kog parade contingents telok toku - Police Commissionerate; 15th NAP (IR) Mahila Battalion; Excise Directorate; Home Guard; Ex-servicemen; NCC Holy Cross Higher Secondary School, Dimapur; Higher Secondary School, Dimapur; NCC Dimapur Government College, Dimapur; Cornerstone School, Dimapur aser 43 AR Band Platoon nungi liasü.

Parade contingents ya Parade Commander Poolicharla Ramanaiah, IPS (Probationer);

Parade 2 i/c Solo Kath, ABI, Police Commissionerate, Dimapur aser Pradeep BHM Khekato Sema, Havildar, Police Commissionerate, Dimapur nungertem lenisüba kübok liasü.

Iba sentong nung Dimapur Mission School ajanga linük ken ka aten, Chekyie Cultural Club ajanga sobaliba tsüngsang ka agi shilem agi, Garo Cultural Troupe aser Khamniungan Cultural Club nungeria shilem agia liasü.

Iba sülen tongti tesemdangeri exhibition stall tem semzüksü, kong Agriculture, Horticulture, Nagaland Handloom & Handcrafts Development Corporation, District Rural Development Agency, Dimul, District Industries Centre, Food safety, Dimapur District Legal Service Authority, DIPR ama department balala den Local Decorative ajanga stall 18 lapok aser CMO ajanga First Aid agüja liasü.

Iba sentong nung Advisor, Tribal Affairs & Election, H. Tovihoto Ayemi; Deputy Commissioner Dimapur, Dr. Tinojungshi Chang; Commissioner of Police, Dimapur, Kevithuto Sophie, IPS nungertem dena liasü.

Nikongdang sempet agütsüba sülen 43rd Assam Rifles ajanga 'beating of retreat' agia liasü.

**NAGALAND HOUSE, NEW DELHI:**

Nagaland House, New

Delhi nung 75th Republic Day ya Nagaland House, 29 - Dr. APJ Abdul Kalam Road, New Delhi nung Minister, Health & Family Welfare, Government of Nagaland, P. Paiwang Konyak tongti tesemdang sür munga liasü.

Iba sentong nung MLA B. Bangtick Phom den Nagaland House, New Delhi nung ketdangsür aser staff temi shilem agia liasü.

**CHÜMOUKEDIMA:**

Chümoukedima Town Public Ground nung 75th Republic Day amungba sentong Minister, Women Resource Development & Horticulture, Salhoutuonuo Kruse-i moaja liasü.

Minister Kruse-i National Flag salatsüba sülen parade contingents semdanga liasü, kong parade contingents ya NCC, Govt. Higher Secondary School; Tetso College; St. Joseph University; Ex-servicemen; Patkai Christian College; Pipe Band ARTC & S. Shokhuvi nungi liasü.

Iba sentong nung Kuki aser Phom Cultural Troupe nungi sobaliba tsüngsang tem ajanga shilem agi aser ARTC & S. Shokhuvi ajanga beating of retreat agia liasü.

Iba anogo Minister Kruse-isa Exhibition stall semzüksü, koba Department of Agri aser allied sectors ajanga amenoka liasü.

**TULI:**

Tuli town nunga 75th Republic Day sentong ya Tuli

Public Ground nung agia liasü, kong MLA Nuklutoshi tongti tesemdang liasü.

Pai National Flag salatsüba den Republic Day message zünga ashi aser parade contingents nungi Rashtriya salute agia liasü.

Iba sentong nung Christian School Tuli ajanga National Anthem aten, kong parade contingents pezüi march past nung shilem agi.

Sentong nung Nungdennungla ajanga linük naklo ken ka aten, K.V School Tuli ajanga tsüngsang ka agi shilem agi, R.K. School Tulu ajanga tsüngsang ka agi shilem agia liasü. Maneni tongti tesemdangeri 9th Tuli

Marathon Race cum Volleyball Tournament, Cleanest & Best Maintained Ward, Cleanliness maintenance & Beautification of Shop indang sempet agüja liasü.

**CHANGTONGYA:**

SDO (Civil) Office Complex, Changtongya nunga 75th Republic Day ya January 26, 2024 nü munga liasü. Iba sentong nung Sub-Divisional Officer (Civil), C. Wangan, NCS ajanga National Flag salatsü aser St. John's School, Changtongya ajanga National Anthem atenba sülen C. Wangan-i Republic Day speech zünga liasü.

Iba sentong nung department ajunga nungi ketdangsürtem, GBs aser lenirtem dena liasü.

(Maneni tapak 7 nung...)

## Molungkimong nung Development of Pilgrimage Facilitation semzüksü



Molungkimong nung January 25, 2024 nü Development of Pilgrimage Facilitation semzüksüdang tangokba noksa ka nung Minister, Tourism & Higher Education, Temjen Imna Along den dangartem angur.

**Dimapur, Aenjeti/January 26 (TYO):** 'Pilgrimage Rejuvenation and Spiritual Heritage Augmentation Drive' (PRASHAD) schem 2019-20 kübok Minister, Tourism & Higher Education, Government of Nagaland, Temjen Imna Along ajanga January 25, 2024 nü

Molungkimong yimdak Development of Pilgrimage Facilitation semzüksü liasü.

Iba sentong nung menden Veyielo Doulo, Additional Director, Tourism, Nagaland liasü aser Rev. Moaliba Tzudir, Pastor, Molungkimong Baptist Church ajanga item ki o jen meshiteta sarasademtsü.

Sentong nung Rongsenwati Longchar, Chariman, Molungkimong Village Council ajanga pela agizükba o jembi aser Er. Vizotuo Seletsu, Executive Engineer Tourism ajanga technical report agütsü aser Limanguba Tzudir-i melepzüng o jembia liasü.

## Nagaland Angh-i Department balala indang Exhibition Stalls semzüksü

**Dimapur, Aenjeti/January 26 (TYO):** Nagaland indang Chief Minister, Neiphu Rio, tongtipang nisungtem aser sorkar ketdangsürtem lia 75th Republic Day nüngtem nung Nagaland Angh La Ganesan-i January 26, 2024 nü Secretariat Plaza, Kohima nung exhibition stall tem semzüksü liasü.

Iba tesem nung department balalai stall 12 tashi lapoka liasü.

Department of Information & Public Relations ajanga 'Journey of Nagaland through the Lens' omen kübok photography exhibition ka lapoka archives nung aliba noksa tem aser wadang balala nung terenlok mapa inyakba indang noksa tem sayua liasü.

Department of Land Resources ajanga coffee ainba stages balala sayuba den tesemdang ajanga nem coffee angati jemdaksü aser Nagaland State Rural Livelihood Mission kübok lemtamatar temi yangluba densema chiyongtsü balala sayua liasü.

Department of Industries and Commerce ajanga süng aser süngkum agi yangluba handicrafts sayu aser citronella oil yoka liasü.

Mulberry, eri, Tussar aser Muga agi yangluba silk tabu balala Department of Sericulture indang stall nung sayu aser castor seed oil, solar panel amshiba portable weaving machine tem sayu.

(Maneni tapak 8 nung...)



# MEGA JOB EXPO 2024

## MAPA AGÜTSÜDAK



AN INITIATIVE OF THE MOKOKCHUNG DISTRICT PLANNING & DEVELOPMENT BOARD AND DISTRICT SKILL COMMITTEE

30 - 31 JANUARY 2024 10:00 AM - 04:00 PM

FAZL ALI COLLEGE, MOKOKCHUNG

- \* TAZÜNGER ASER MAZÜNGER AJAK ATEMA - MAPA ANGUDAK !
- \* MAPA ATEMA SENOTSÜ BUSHIYIM ASER AMSHIYIM ANGAZÜKDAK !
- \* NAI YANGLUTETBATEM TESEM BALALA NUNG AYOKTSÜ LENMANG BUSHIDAK !

**YANGI JELIA REGISTER ASÜTSÜ AKOK CONNECTINGCAREERS.ORG**



**MESÜRA IBA QR CODE NUNG TANG SCAN SER SIGN SANGMA**

### EVENT PARTNERS



### LOGISTICS PARTNER



### MEDIA PARTNERS



jobexpomkg@gmail.com

+91 87308 65974  
+91 82570 46496

Fazl Ali College campus nung plastic oset mamshidaktsür, anungji mapa asüngdangi arurtemi plastic tzü pongdang bener marutsü mepishir. Kokra pei meyong tzü pongdang (water bottle) bener arungma.

## France Tir Macron-i 75buba India Republic Day nung shilem agi



New Delhi, Aenjeti/January 26 (Agencies): France tir Emmanuel Macron-i Hokolbarnü New Delhi kübok majestic Kartavya Path nung India Tir Droupadi Murmu, Ato Kilonser Narendra Modi aser Defence Minister Rajnath Singh nung den külemi 75buba India Republic Day nung shilem agiogo.

Ano Macron den külemi Union Cabinet züngsemtem, foreign diplomat tem aser tanga tongtibang lenirtemi iba

sentong nung shilem agiogo, kong military parade aser sobaliba sentong balala saya liasü.

Sentong nung shilem magi tsüngda France nung lenir yagi social media ajanga India nungertem den Republic Day salem lemsatep aser ashiba agi, pa iba sentong nung densemba atema nümadanga bilemer. "Republic Day salem abener. Nenok den densemba atema kanga pelar aser nema adanger. Asenok ajak

benjungtepti," ta pai ashi.

Maneni France Tir ya Droupadi Murmu den külemi special presidential carriage ka nung sanger aoba nguogo, koba tir indang Bodyguard temi meiner Kartavya Path nung senzüa liasü.

Iba sülen Macron-i social media sabang X nung video ka lemsatepba liasü, kong French contingent march asüba nguogo. Paisa, " iba ya France asoshi tetushi tulu. India dang kanga pelar," ta ashi.

Brehostibarnü Jaipur-i aruba sülen France lenir ya External Affairs Minister S Jaishankar-i agizük, kong Macron, Ato Kilonser Modi den roadshow ka nung shilem agia liasü.

Tang agi trokbenbuba France nung lenirtemi India nung benjung tulutiba nung shilem agiogo. France nung lenirtem rongnung mezüngbuba 1976 küm Tir Jacques Chirac-i shilem agi aser iba sülen 1980 küm Valery Giscard d'Estaing, 2008 küm Nicolas Sarkozy aser 2016 küm Francois Hollande nungeri iba sentong nung shilem agia liasü.

## Constitution tamendakdak sorkari amaker: Kharge



New Delhi, Aenjeti/January 26 (Agencies): Congress tir Mallikarjun Kharge-i Hokolbarnü ashiba agi, India Constitution tongshitem sorkari kanga junga tasa asar makdar. Paisa Congress party-i Constitution, democracy aser justice kümzüka ayutsü atema bangjemogo, ta shisem.

"2024 küm ya India atema kanga tongtibang küm ka lir. Constitution aser Democracy indang value tem kümzüka yutettsü meyetettsü mesüra ajak nem temeden kasa magütsüba putu ka dangi Republic Day nü X sabang nung lemsatep.

"Linük Constitution yaglor "

Pandit (Jawaharlal) Nehru, Babasaheb Ambedkar, Sardar Patel, Babu Rajendra Prasad, Maulana Azad aser tanga Constituent Assembly züngsemtemi Constitution yamai amokmerentsü tabo mebileme liasü südi," ta pai ashi.

Kharge-i, Bengaluru nung Karnataka Pradesh Congress Committee (KPCC) office nung India wako atsüketja liasü.

Kharge-isa, RSS aser BJP na anema jembiogo.

"Constitution raksatsütsü aser melenshitsütsü atema RSS aser BJP nati tasa asadar. BJP-i autonomous body tem ka khen ka khen ta raksatsütsü mesüra tashi meite küm daksütsü asoshi takokka tashi inyakdar," ta pai ashi.

## Menden lemdangtsü asoshi Congress pur anogo 210 ataogo: TMC

Kolkata, Aenjeti/January 26 (Agencies): Trinamool Congress-i Bengal nung parnok Lok Sabha menden 42 prongla nungi tokteptsü ta Congress nem formaly osang agütsüogo, ta TMC MP kati Brehostibarnü ashi.

Trinamool-isa, Bengal nung menden lemdangtsü asoshi tamakok anguba kuli asem lir aji "(Pradesh Congress tir) Adhir Chowdhury, Adhir Chowdhury aser Adhir Chowdhury lir," ta ashi.

TMC-i ashiba agi, taoba küm June ita Patna nung INDIA bloc senden amenba sülen parnoki anogo 210 ataogo, ajisüaka Chowdhury-i par party anema jembishinüba maziüktetba ajanga Congress-i parnok indang ongen tuogo.

Party indang Rajya Sabha lenir, Derek O'Brien-i ashiba agi, "Delhi nunga (December ita INDIA bloc senden) onoki Congress dang December 31 nü tashi nungbo menden lemdangtsü asoshi sensaksem tembangtsü mepeshia liasü. Iba sülena onoki atasaogo aser alliance politics sülen anidakogo. Ajisüaka Chowdhury-i onok anema nokdak. Pai state nem centre-i tagütsütsü tim magütsüi aliba indang ken o khen danga jembia mangu. Pai BJP anema masü saka onok anema dang jembir."

Trinamool lenir-i ashiba agi, "Adhir Chowdhury ya Lok

Sabha nung Congress lenir ka lir, koba Rajya Sabha nung Mallikarjun Kharge den kasa mapa lir. Delhi nung senden amenba sülena TMC anema jembitsü atema pa nem temelaba agütsü. Pai Bengal nung parnok indang ongen atutsü melara onoki kechi sütettsü," ta O'Brien-i ashi.

CM Mamata Banerjee-i Bodhbarnü Bengal nung parnok shingadena longjemer metokteptsü ta jangja jangja metetdaksüba sülen Trinamool lenir kati ashiba agi, Congress-i parnok den tongtepratepogo. "Tongteprateptsü asoshi party anaprongla nung nisung kaka lir. Hau parnoki tongtepratepogo."

Ajisüaka paisa ashiba agi, TMC-i menden lemdangtsü asoshi sensaksem ojang dang asütsü ta shiogo. "Onoki anogo 210 ataogo aser joko ojang dang atatsü," ta pai ashi.

Party-isa, Trinamool pur Bengal nung menden 42 prongla nungi tokteptsü aser iba tetezü parnok Berhampore aser Malda South constituency naprongla nung Chowdhury den tokteptsü.

Bengal nung alliance asüngsashitsü asü, ta asüngdangba mapang lenir yagi ashiba agi, "politics nungbo anogo 210 ji teperi. Congress puri lepa reprangshitsüla. Linük ajunga nung Lok Sabha menden 300 nung parnok BJP den tokteptsü."





## TIR YIMYIM YIMOBILEM (EDITORIAL)

DIMAPUR

KÜPTOKNÜ

AENJETI 27, 2023

### Temzüng akangshiba anogo

India nung küm shia yashi ama January 26 nü Republic Day amungba ya India yimten nüchiso ngur külen joko laa lasasa temzüng ozüng lateta yur nübertem tashi nung yimten yimsüsürtem yimten mapa tenzükba anogo lir. Iba anogo ya 1950 küm January 26 nü tenzük, anungji taküm 2024 küm 75 buba India Republic anogo mungogo. Atangji, India nüchisobo 1947 küm August 15 nü angu, ajisüaka temzüng ozüng lateta yur yimten nüchiso angur masü saka yimten nüchiso jenjang ka lateta yur külenang pei lima aser nübertem dak apet temzüng ozüng lateta yimsüsütsü tenzük. Aji oda, India-a la yimten nüchiso ngur külen linük temzüng yanglutsü atema Dr.B.R.Ambedkar-i anir parnok temzüng luden ka shima nungloksüba ama, küm ana ser ita terka agia linük temzüng renema bener arua tatar hoho nung agizük. January 26 shimtetba yabo India yimten nüchiso asoshi British India anema nokdakba mapang Indian National Congress teloki 1930 küm January 26 nü India yimten nüchiso nguogo ta sangdong. Iba sülen küm 17 buba nungang shitakba yimten nüchisobo angu saka iba anogoji India yimten otsü nung teti alitsü atema linük temzüng lateter mapa kuma aoba anogo asütsü shimtet. Aji oda, küm shia linük temzüng mapa kuma aoba anogomung bilemteta 'Republic Day' amungba ya senso shia asoshi linük temzüng akangshiba anogo lir. Ibaji angateta iba anogo ya amung nungbo, Republic Day anogo nung ya tesem ajaklen linük temzüng ajunga masüyonga omen (preamble) danga zünga yimsüsürtem aser nübertem rongnung shisalemsateptsübajiang tongtibangba süla. Atangji, linük asoshi terenlok mapatem inyakba nübertem nem metetdaksütsübaji yimten lenirtem mapa saka ano anogomung tetezü meteta amungtsübajisa tongtibangba lir. Aji oda, India temzüng lateter mapa kuma tenzükba anogomung nung linük temzüng ajak zünga mouaka, temzüng amendakdak omen khen repringdangdi süra, iba omen nung, "Asenok, India nungertemi India ya Sovereign, Socialist, Secular, Democratic Republic asütsü kanga metsünga-reta lemteter aser iba jagi senso ajak nem Justice, Liberty, Equality, Fraternity agütsütetsü," ta lateta lir. Sovereign tetezü tangar yimten tashi kübok masü saka sensosangertem dak yimten tashi ajak keta aliba lima asütsü, Socialist tetezü linük nung rongsen ajak kar ket nung dang melii ajak ket nung alitsüsa inyaktsü, Secular tetezü linük nung senso shia nem pei amangnüba tsüngrem aser tamangba yimsü amangtsü temeten agütsütsü aser Democratic Republic tetezü yimten yimsüsüba tashiji nübor ket nung alitsü. Iba tenangzükbaji kodang bilemdangdir, India temzüng ya tatar hoho nung tatartem parnok tenung nung dang latetba temzüng ka masü saka India nung ajaki kanga süoki ia aser metsüngareta lemtetba yimten temzüng ka lir, anungji iba temzüng yagi senso ajak peisasa alener aser peisasa temetena angur. Item telemtetba onüktemji ka khen, ka khen ta kodang asenoki tanü asenok yimten tensa den medemdangdir, ashiko tesem kar nungbo asenoki lemtetba ama mesüi inyaka oa alitsüa akok. Item rongnungji Socialist aser Secular ta asüba ojang ana nung ya ashishiteptsüsa tesem kar nungbo atalokba angutsü. Linük temzüng yanglurtemi India nung kar kanga takar aküm dang, karbo kanga sensaker akümtsüsa mesüi rongsen bendenba aser ketdangsüba nung liromedema aotsü nükjidong nung yimtenia sensosangertem asoshi rongsen renlokdaksüba maparentem nung shilem agitsü tangatetba aser nükla yur latet, ajisüaka yimteni nübertem asoshi rongsen renlokdaksüba maparen nung kibur kuma inyaktsübaji tamakoktsü amai kuma aoba angur. Ano, tongtibang onük kaji, temzüngibo linük nung nübertem rongnung tamangba yimsü ajanga mepetmesü madoktsü atema senso shia nem pei amangnütsü amangtsü aser mamangnüra mamangtsü temeten agütsü. Ajisüaka, tanübo India nung tesem aika nung tamangba yimsü ka dang amangdaksütsü merangba mapatem angur. Itemji Republic Day nung repringshia, 1949 küm ajaki mulunga lemtetba ama, akangshi nunga koda jungla ?

## OLEMSABANG

### Tasembuba Tenlaki Asoshi Sapisayangteper

O. Tongpang Jamir, CTN.

Tang Israel aser Hamas rara tialong nung, Middle East nung dang masü saka New York, Spain aser alima tesem balala aika nung meraratsüla ta ola adokba manener. Ajioda ano Israel artsülen taoksatsüla kar atalokdar. Jewish nüburtemi pei tasoli temeden aser parnok süiren tekülemba jaka wazüka ayutsü asoshi telemtetba agiogo. Süiren bushirtemi amangbaji tang teraratak aser Israel yanglusbaji Jewish nüburtemi tetsükdaksü mapatem tera ajururba dang. Anungji iba tiaji parnoki koda malen sütettsü ta aikati bilemdar.

Muslim loktitemi iba wadangji tembanga inyaktettsü meladima? Asenoki khen repringdangdi : Hopta ishika tsüngda nung, nüburtem dak ajungbena amakba mapatem ajanga Israel asoshi alimai aria bilemtsüa aru. October 7, 2023 tatalokba agi Israel sensotem mulungzünsen nung kanga tipmedemdaksür, kechiyong parnok asoshi pei temeimbatem jenti Islamic kiralongrar teka nung samaogo. Ajioda, Israel-i ano maneni azütokshi tesashiba ajurutsü ama repringdar. Iba tensa tialong nung, Israel artsülen süngmangtsüsa kar atalokdagi. Iba balaka tatalokbaji, tenlaki tasembuba asütsü asoshi asameyangbaji kodasür aser kechiba tamangba yimsü balalai iba nükjidongji atongtsü asoshi rarateper? Tang Israel nung atalokbaji repringdang tamangba yimsü balalatem kanga süngmangdaksüdar, aser itemi jangjatsü asoshi tamasa Israel otsürenji khen meyipa repringshitsü nungdaker.

Israel ta asüba ya officially süa jatetbaji State of Israel ta sür kanga dang meraketa Middle East tiyongtsü nung lir. Lar kiyongertemji Lebanon anüdoklentip, Syria aser Jordan anüdoklen, Egypt anüolentip, aser Mediterranean Tzüyim anüolen ta lir. Israel nung süirenji repringdangra, pei sobaliba nung takar süa takloka aliba aser tangar dang nungi alakteta papu (unique) sempet alirtem jenti lia aru.

Tejen Lai nung, Abrahami küm 75 asüdang Tsüngremer tajaba angateta pei aliba tesem toktsür kinungtsü Sarala aser tanük Lot nung anir apusoa aenlenmang jajaa Canaan limai ao. Iba limajiang Tsüngremi pa aser pa dak nungi jazükertem alitsü asoshi agütsüba tenangzükba limaji liasü. Ajioda, Canaan limajia Canaan nung kin kidong balalai amokbanga aliba lima ka lia tenji. Item kintemji, Hititites, Amorites, Hivites, Jebusites, Perizzites aser Girgashites nungertem liasü. Canaan nungertemji meyoktepshilu (diversity) den rongsenketsüng aser sobaliba nung kanga takar aser aluyimba aser shishilembaba nung takutet liasü. Parnoki tsüngrem tapu balala dak amang. Abraham Canaan limai arubaji küm aser anogo tejangja Laishiba nung zülua maka saka tebushitetertemi ashiba agi Meyizüng anabuba BC shi nung aru. Canaan nungertem aser Abraham tesentaktepji mapang shia tatayuyu agi sünger ano khenkhenbo tembar tajung ama lia aru. Tsükdangradang tapu balala ajuruyongbo oda pa par sosem dangsemtem den yangji arua lipoka ali.

Israel limaji tamangba yimsü aser sobaliba balala agi züp ta amokbanger aliba lima ka, kong Abraham metsü nungi jazüka aruba tamangba yimsü tongtibang tapu asem lir itemji, Judaism, Christianity aser Islam. Tesüiba pututem repringdangra ibai alima nung yimsoshiba poktetba tesem rongnung ka lir. Akhi putu Israel aser Canaan nung nungi Assyria, Babylon aser Persia yimli tashi arudang yimsoshibaren kodanga mamatoktsüsa jenti ataloka lir. Israel kintem Saul Chuba mapang 1000 BC shi nung lungjem, koba dang United Monarchy ta ajar. David Chubai Saul melenzük aser Jerusalem capital yanglu, ajioda Solomon Chubai mezüngbuba tenlaki (First Temple) Temple Mount yanglu. Iba tenlaki ya külemtsü asoshi tiyongtsütiba, tarungba tenla agütsüba tesem ano Jewish nüburtem aser Tsüngrem tsüngda tezüngzüktepba yangluba tesem aküm. Solomon yimsüsüba sülen, chubayimlaji ana kuma anüdoklentip aser anüolentip chubayimli ta kuma lemsa.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir



## Nigeria nung Muslim aser Khristanpur tsungta rara, nisung asü



Mangu jila nung ki 100 shi raksatsogo ta yangji alirtemi ashir. Central Nigeria kübok iba jila nung telok balala tsungta ananü raraba nung nisung 43 shi süogo, aser tasü mang maneni bushir, ta yangji alirtemi ashi.

**Mangu, Aenjeti/January 26 (Agencies):** Nigeria indang central Plateau State nung asendenshia azüdokshiba nung nisung 30 shi asü, kong Muslim nung shiruru metsür aser Khristanpur aluyimertem tsungta küm aika raratepa arur, ta yangji aliba lokti tentet balala ajanga Brehostibarnü ashi.

Plateau state kübok Mangu local district nung ghonda 24 atema Mongulbarnü curfew sangdongaka school, tekülem ki aser nisung aliba ki rongdoktsü aser raksatsü, ta yangji aliba lenirtemi ashi.

Kwasalalek yim maka nisung 30 shi tepsetba atema Khristanpur timba aliba ethnic Mwaghavul nüburtem asoshi tentetba Mwaghavul Development Association ajanga Fulani Muslim shiruru metsürtem tenüng asener.

"Tang ozü nüburtem Tsüngrem taochi nung lir aser parnoki inyaktetsü ajak agi parnok sasa parnok kumzüka ayutsüba dang lir," ta iba association yagi sangdong ka nung ashi.

Yangji tekumzükertem aser aid group temia nisung asüba ya metedaktsü. Nisung 100 dak tema yiru, ta aid source ajanga ashir.

Tang tesüsa lendong

agütsüba ajanga asürtem indang security personnel temi ano mejembir.

Item tesem nungi pei ki yutsür jena aortem nisung 1,500 shi atema Mangu jila nung camp ana yangluja lir, ta yangji aliba Nigeria Red Cross chairman Nurudeen Husaini Magaji-i osangbener dang ashi.

Ano rongrong ka adokba sülen Plateau indang governor-i Mongulbarnü curfew ya sangdonga liasü aser ibai shiruru metsürtem shiruru belenshiba aser yangji aliba dangartemi lenmang amshiba ajanga mangatetep adok ta ketdangsurtemi ashir.

Iba state ya Middle Belt nung lir, koba Nigeria nung Muslim nung timba aliba north aser Khristanpur timba aliba south sadangba tesem ka ama lir. Iba region nung kin balala tsungta raraba teti alir, kong Mwaghavul ama ethnic minorities aika lir.

Iba region aser northwest nung rara adokba ya tesem ka nungi ka nung oa shiruru metsüa jajartem aser lisopur aluyimer tsungta ali mechi timba lir. Muslim nung shiruru metsürtemi amakba nungi kumzüka alitsü mechi 'self-defence vigilante groups' tentettsüsa akumer ta

Khristanpur aluyimer temi ashir.

Tayang kepzüktepa amakba aser mapa tamajung inyaker tali aliba ajanga tensa tamajungba akumer. Nok-nü tesashi bena aliba telok, shirnok dang bandits ta ajar, parnoki northwest state tem nung yimtsüngtem amaker, tashiyim amshia rongsen rakzüka bener aor aser senotsü mechitsü mechi nisung apur. Iba rara ya Nigeria southwest aser southeast tsütsüa prokshia aor.

Christmas mapang Khristanpur aliba yimtsüngtem amakdang nisung 200 jungnüa tepsetba sülen tensa tali tamajungba akum.

Muslim nung tentetba telok, Jama'atu Nasril Islam-ia Mongulbar aser Bodhbarnü tsungta Mangu jila nung rara adokba mapang tekülem ki aser tamangba yimsü nung ajemdaker lapoka aliba school tem raksatsü ta ashi.

"Mangu aser dangalen rongrong dokba tesemtem nung nisung takum aser ki o jen wazüka ayutsü atema sorkar aser security agency temi tali meranga inyaktetsü ajungshir, ta JNI indang state director Salim Musa Umar-i ashi.

"Tensa tali tamajungba mekumdaktsütsü asoshi ajaki mera agitsüla," ta ashi.

## US nung tamangba yimsü tsütsü "Nones" timba akumer

**Washington, Aenjeti/January 26 (Agencies):** Tamangba yimsü indang asündang dang America nung timbai "none of the above" shimba ya tang tali kumogo.

Tamangba yimsü temeja ka sülen manidaker dang ya kari "nones" ta ajar aser tesüba küm ishika tsungta item ya kanga züina kumogo, ta Pew Research Center ajanga ashir.

2007 küm agnostic, atheist mesüra tamangba yimsü balaka malirtem (nones) ya America nung shilem 16 dang liasü. Taküm parnok shilem 28 kumogo.

Shilem 28 ya maneni loksa nung shilem 17 atheist, shilem 20 agnostic aser shilem 63 ya "nothing in particular" ta Pew survey ajanga ngutet. "Nones"

nung alirtem timbai parnok Khristan kibong nung soa intet ta ashir.

"Nones" shimer ya tesüngmangtsüka lanurtem lir, kong shilem 69 bo arushi küm 50 teküpok aser temesüng nisung shilem 63 lir.

"Nones" pur nisung 3,317 den survey agiba nung timbai "Tsüngrem" dak amanger saka Laishiba nung shia aliba ama mesüra "temaba tashi" nung masü. Parnok tesadang kati parnok ya "spiritual" ta ashir aser shilem 29-i alima nung temaba tashi mesüra tanüla tashi magizüker.

America nung Tsüngrem dak mangertem ya shilem 24 Protestant aser shilem 23 Catholic lir.

2018 nungi 2021 tashi Southern Baptist Convention

anir alisang aser North Carolina nung amenoka alisang Pastor J.D. Greear-i ashiba agi, "nones" telok ya tekeraba ainer. Parnoki tamangba yimsü tentet nung temulung melemteter. Parnok ya tanüla nung temulung magütsür masü.

Item ya timba America nung sobaliba nung Khristan yimya agizüker ajema akumba ajanga lir, ta pai ashi.

Greear ya The Summit Church, Durham, North Carolina pastor lir aser par arogoi arogo shibangba tali akumba melentsü asoshi arogo 1,000 tenzüksü sentong lir, ta ashi. Tang tashinung parnoki alima tesem balala nung arogo 500 dak tema tenzüksüogo aser item rongnung 75 bo North American yimtitem nung lir.

## ANO GO ABEN TSÜNGREM DEN

### Chuba putirtem

*Nenok teshimetetba kin, chuba putir telok, temeshi kin, aser Tsüngrem pei agitsü purtem nenok lir.*

- 1 Peter 2:9

Na Khristan ka, süra na Tsüngremi shimtetba putir ka lir. Chuba putir ka ama na maneni chuba dangi aotsü lemanng lapokja lir. Ne taküm nung nungdak adokra, na atema tetsüngdai air putir ka bushitsü menüngdak. Na chuba putir.

Aji oda süaka putira, pa mapa lir. Putir inyakyim kübok putir kati putir mapa inyaktetsüla. Laishiba nung putir kati kija inyakyim amshitsü shia mali, pa balaka tenzüka mapa mali. Putirtem külemi mapa inyaker (Lev. 9:1). Lairen masüba kija mapaji Tsüngrem putir kübok pai bilemba mapa nungi pilatsü akok.

Nübur matsüngdang putirji Tsüngrem melen noktakba lir, saka pai ano Tsüngrem dangi nübur tebilemba abener. Na meketa kar Tsüngrem dang mepishitsütsü putir sarasadem nungdaka lir asü? Karbo ne taküm nung Tsüngrem angu nung dang Tsüngrem metetta arutsüba alitsü akok. Khristaji shidakba taküm lir ta pa nübur taküm agi sayuba alimai nungdaker. Tsüngremi ajaba dang nungi asen mapa temaba südaktsübaji lendong lir. Asenok mezüngbuba putir asütsü aja, aser tanabuba mapa ka nung sotdaktsü aja. Kodang asenoki ibai meinyaklir asen meketa alir ajaki asenok ajanga Tsüngrem dangi aotsü songtemtsü. Tsüngremi secular mapa kati ajatsü akok, saka iba dang nungi talisa na Pa putir ka asütsü shimtet.

## Laishiba den sendaktepba mechi Russian scientist ka mapa nungi anentsü



Alexander Kudryavtsev

**Moscow, Aenjeti/January 26 (Agencies):** Mapang ka meimchir ya küm noklang aika lia aru saka pei tetsü-tebou menen yong arishi tatsüba akumer ta nokdakba ajanga mangatetep adoka nungtugu genetics institute nung tekolakba Russia indang science & higher education ministry-i anentsü, ta sorkar meyong news agency RIA-Novosti-i Brehostibarnü ashi.

Osang nung Alexander Kudryavtsev mapa nungi anentsüba kuli magütsü, saka ibai tamangba yimsü nung ajemdaker inyakba lir ta Russian Orthodox Church-i ashir.

Kudryavtsev ya Russian Academy of Science's Vavilov Institute of General Genetics nung tekolakba liasü aser pai 2023 küm mungdang ka nung presentation agütsüba mapang,

Laishiba nung tzüme tsüng aruba shia aliba putu jakdang nisungtem arishi küm 900 tashi liasü aser shidakba tetsü-tebou aser pei temenen yong genetic tashidak adoka arishi küm tatsüba kumdaktsü, ta shia liasü.

Pei tsürabortem temenen ya generation tenet tashi alitsü ta pai iba mapang shia liasü.

Russian church's commission on family issues tekolakba Fyodor Lukyanov-i ashiba agi, Kudryavtsev ya tamangba yimsü mechi anentsü aser item tamangba yagi scientific community indang inyakyim nung aibelener, ta RIA-Novosti ajanga ashi.

"Asenoki Soviet mapang ajanga aruogo, aser iba mapang genetics ya pseudoscience (scientific yimya nung amendak ta aibelena amanga amshiba) ama züngshia liasü," ta Lukyanov-i ashi.



AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Shisaluyim

(n) zülutsü aser azüngtsü angazüka shisatsü bushiba (schooling)

\* Shisaluyim nung kaket azüngba mapa ya tongtibang mapa lir.

Shisaluyimdak

(n) shisatsü bushidak aser angudak riju ( educational institution)

\* Asen lima nung shisaluyimdak tajung nüngdaker.

OLONG PAITEP # 6679

Grid for crossword puzzle #6679 with numbers 1-16 indicating starting positions.

TIPIEN

- 1. Pei sasa ulua bilemba -6
5. Nisung aika -5
7. Tebang nungi adokba -3
9. Tatalokbatem metetpela -5
10. A \_\_\_ nu -3
13. Tebur kin-kidong merasai jatepba -7
14. Ken atema meshia ata -3
16. Küm ka nung asortem -5
17. Songjen / Ajak -6

LANGTSÜNGLEN

- 2. Shi alangsadak -10
3. Ita ter ana -3
4. Tangoka ayuba -5
6. Tebenja mali -10
8. Sü \_\_\_ ong -3
11. T \_\_\_ r -3
12. Hopta nung shilem ka -5
15. Süngdong nung shilem ka -3

OLONG PAITEP # 6678 TELANGZÜBA

TIPIEN :

- 1. Telok, 4. Aluru, 6. Ozüng, 8. Emk, 9. Kin, 10. Teti, 12. Süir, 13. Jen, 14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kiochtsü, 5. Lenti, 7. Tajangzük, 11. teronem, 12. Sempa, 13. Jahaz.

NAI-A YA METETTER MA



Cybersecurity researchers ajanga data ayuba mapa tulutiba putetogo aser parnoki iba dang "Mother of all Breaches" (MOAB) ta jaloktsüogo. X (taoba Twitter), LinkedIn, Dropbox aser government websites nung data records billion 26 shi ka miimbanga aliba yimjaki adokogo ta Security Discovery aser CyberNews nung researchers-i ashi aser parnoki nübortem dang passwords melentsü, emails & links nungi kümdanga alitsü aser two-factor authentication amshitsü metetdaksüogo.

ITBP jawans-i Indo-China arrtsü tenem kolak nung R-Day among



Itanagar, January 26, 2024

(Agencies): January 26 nü Indo-Tibetan Border Police (ITBP) jawans-i Indo-China arrtsü nung 75 buba Republic Day mongogo.

Arunachal Pradesh dena ITBP-i state 5 nung Indo-China arrtsü anüker. Tanü parnoki Indian wako salaba den 'Bharat Mata Ki Jai' yimyimtem ayim.

ITBP jawans-i kanga dang tongtipang tesem ka nung Republic Day amongba ajanga parnoki India arrtsü kümzüka ayutsü tesem tamajung nunga bendanga agüja tenzükba sayur.

ITBP nung regular 56 aser specialist 4 dena battalions 60 lir aser parnoki India-China arrtsü ajungalen anüker.

Hokolbarnü Kartavya Path nung Republic Day tongtiba ayonga among aser ITBP jawans-ia parnok alidak küm 75 buba benjungmong kanga junga ayonga mongogo.

Taküm Republic Day benjungmong ya khenyongi balaka kechiyong nüjiso ngur küm 75 buba amongba sülen 'Azadi Ka Amrit Mahotsav' sülen anidaka among.

Tanü benjung tongtiba nung

France President Emmanuel Macron-i tongti tesemdanger ama shilem agi aser pai India o France tsüngda tesentaktep takang indang jembi.

Arunachal Pradesh nung ITBP jawans-i Republic Day amongba ajanga Tawang sector nung tawa mangatettep adokba bilemtetdaksür, kechiyong December 2022 nung iba tesem nung China sepaitem den raratepa liasü.

Item tayongzükbatem liaka ITBP-i kanga dang bendanga arrtsü anüker aser linük kümzüka ayur.

Siliguri nung Rahul'er 'Bharat Jodo Nyay Yatra' temelaba magütsü

Siliguri, January 26, 2024

(Agencies): West Bengal nung Trinamool Congress (TMC)-i aniba sorkari Rahul Gandhi'er 'Bharat Jodo Nyay Yatra' atema temelaba magütsüba ajanga tetsükdaksü ajuruogo.

Hokolbarnü ketdangsurtemi Siliguri region telungi yatra arutsü noktanga liasü.

Bharat Jodo Nyay Yatra' tenzükker anogo 12 buba nung Assam nungi West Bengal kübok Bakshirhat tesem atong saka tetsükdaksü ajuruba ajanga Delhi-i apusoa ao.

Bharatiya Janata Party (BJP) aser Rashtriya Swayamsevak Sangh (RSS)-i tim masüba inyakba anema iba yatra ya ayonga agir. January 28 nungi yatra tenzüksü aser parnok Siliguri-i aotsü.

Rahul Gandhi'er yatra Siliguri-i marudaksüba atema Assam Senior Additional Advocate General aser Bharatiya Janata Party (BJP) National Spokesperson Nalin Kohli-i kuli meshiogo.

Iba ajanga West Bengal nung Congress aser Trinamool Congress tsüngda tesentaktep

mejungi akümba sayur, anungji party anati temelaba magütsüba atema osang tejangja metetdaksütsüla ta Kohli-i ashi.

"Congress party aser Trinamool Congress ajanga dang iba osang shitettsü. Kechiba Rahul Gandhi'er yatra West Bengal kübok Siliguri nung magidaksür" ta paisa ashi.

"Parnoki (Congress) kü dang kecha mashi" ta West Bengal Chief Minister Mamata Banerjee-ia metetdaksüogo.

Külen, TMC-ia parnok Rahul Gandhi'er yatra nung madentsü ta shiogo.

Assam Rifles-i Manipur nung süngpak aika apu



Imphal, January 26, 2024

(Agencies): Assam Rifles-i ozüng alema süng shibelener nisung 4 apu aser parnok ket nungi Rs. 6.8 lakh alang süng puogo.

Süng shibelendang amshiba gari ana puogo ta defense wing-i metetdaksü.

Inspector General of Assam Rifles (South) kübok Assam Rifles sepaitemi Manipur kübok

Kamjong district nung gari ana sot. Iba tesem ya Myanmar den arrtsü anasa lir.

Kamjong nung Military Vehicle Check Post ka mendanga atadang truck gari ana nung nisung pezü mener aru. Garitem nung temulung meleme bilemtsüsa osettem bena liasü.

Assam Rifles sepaitemi gari ana reprangdang firewood

compartment kübok süngpak miima bena aliba angu. Süngpakji Kamjong adena Imphal-i bener orr black market nung ayoktsüba liasü.

Iba mapang regional markets nung Rs. 6.8 lakh jengang süngpak apu aser item ajakji Forest Beat Office, Kamjong district ket nung agütsüogo, ta Assam Rifles sangdong nungsa metetdaksü.



# Burkina Faso army temi civilian aika tepsetogo: HRW

**New York, Aenjeti/January 26 (Agencies):** Burkina Faso army temi drone amshia amakba nung civilian 60 shi tepsetogo, koba sorkari telunpur dak tenük yoker amakba lir ta ashi, ta international watchdog Human Rights Watch (HRW) ajanga Brehostibarnü tai tongloksü.

Civilian tem asüba ya August ita nungi mitkar temi asemen drone amshia amakba nungi lir, anaben nisung nungtepa aliba shishilempadak aser khen asüpila sentong nung amak, ta iba telok yagi report tasen ka nung ashi.

2022 küm mitkar tashi amshia sorkar atsingdoker linük tekolakba akumba sülen Captain Ibrahim Traore-i sepa tashi amshia al-Qaeda aser ISIS (ISIL) telok den sendaktepa aliba telungpur telok temi amokbanga aliba tesemtem tanaben agitsü merangba nung ranglok.

Ajisüaka yamaji inyakba ya tashi tali amshir ta aitsü aser HRW ajanga osang agütsüba ya tesüsaba alitsü.

HRW-i September aser November 2023 tsüngta tenük kuli alirtem den sensaksemogo aser noksa, video aser satellite images tem asadangogo ta ashir.

"Burkina Faso mitkar temi

nok-nü tajung amshia nisung telok tulu dak amakba ajanga civilian jenti takum sama aser 'laws of war' nung aibelener," ta New York nung amenoka aliba HRW ajanga ashi.

Drone amshia amakba ya civilian aser mitkar tem mebendangi lir aser yamaji inyaktsü 'law-of-war' agi memelar aser iba ya war crimes lir, ta ashi.

August 3 nü Burkina Faso sorkar meyong Radiodiffusion Television du Burkina (RTB) channel ajanga sangdong ka nung, linük north tsütsü Bouro jila nung telungpur telok ka anema takok ngua aoir operation agiogo, ta shia liasü. RTB ajanga video ka sayuba nung guided munition ka nisung aser shiruru aika alidak khaloktsüba nguogo.

Nisung agi mesemi alidak nisung 28 tepset aser aika yiru ta yangji alirtemi HRW dang ashi.

Al-Qaeda den sendaktepa aliba Group to Support Islam and Muslims (GSIM) ajanga Bouro aser temeket tesemtem amokbanga lir ta parnokki ashi. Sepaitemi amakdang sorkar anemer mena aliba motorbike pezü shishilempada tesemi ait, kong civilian noklang dak tema liasü, ta lendong nungi takum

jenbur nisung aseme ashi.

November 18 nü military drone kati ano arütsü alema orr Mali nung Boulkessi jila anasa nisung nungtepa aliba market ka amak aser iba mapang nisung tenet asü aser pongu yiru, ta osang ajanga ashir.

Sorkar anema nokdaker indang 'logistic base' ka amak ta RTB osangbener temi ashi.

Ajisüaka arishi küm 69 tain tebur kati HRW dang ashiba agi, par jabaso ana market nung parnokki züsentetba ayoki ao aser parnok ya telungpur masü shishilempar aser civilian liasü.

Anogo asem lir Burkinabe north tsütsü Bidi jila nung drone kati süki ka amak, kong asüpila sentong atema nisung noklang aika adenshia liasü aser iba mapang tebur 24 aser teburchanu ka asü.

Burkina Faso sorkar tekeraba nung aser ochi nung bushisüngdang asütsüla aser aibelener nem temerenshi agütsütsüla aser lendong ajuru alir nem teyari peria agütsütsüla, ta HRW ajanga ashi.

April 2023 nunga sepaitemi Karma yimdak tetsür aser kinü tanur densema nisung 136 tepset ta NGO the Collective against Impunity and Stigmatisation of Communities (CISC) ajanga ashir.

# State kübok tesem...

(Tapak 2 nungi...)



Mangkolemba nung Republic Day anogo amungba mapang Advisor Fisheries & Aquatic Resources, A. Pangjung Jamir-i National Flag salatsüba mapang.

## MANGKOLEMBA:

Linük ajunga den külemi Mangkolemba nunga 75th Republic Day sentong Public Ground, Mangkolemba nung agia liasü, kong tongti tesemdanger Advisor, Fisheries & Aquatic Resources, A. Pangjung Jamir liasü.

Iba sentong nung tongti tesemdangeri National Flag salaba sülen Rashtriya salute agi aser Republic Day speech agüja liasü.

Iba anogo tongti tesemdangeri stall balala semzükja liasü.

## LONGLENG:

Longleng nung 75th Republic Day sentong ya Public Ground, Longleng nung January 26, 2024 nü agia liasü, kong tongti tesemdanger ka ama Advisor, Youth Resources and Sports, S. Keoshu Yimchunger dena liasü.

Tongti tesemdangeri iba sentong nung National Flag salatsüba sülen Republic Day speech agütsü aser Parade Contingents trok nungi Rashtriya salute agia liasü.

Longleng nung iba anogomung nung parade contingents ya DEF Longleng, 12th NAP IR Chingtok, Village Guard, Bautung Government Higher Secondary School Longleng, Yingli College aser 12th NAP IR Chingtok Pipe Band nungi liasü.

Iba sentong nung Orangkong Village ajanga sobaliba tsüngsang ka agi shilem agi aser Yachem Students, Longleng Unit ajanga sobaliba ken ka aten.

Iba anogo penalty shootout exhibition match (tebur) nung Police, DC office, DRDA, Education, 12th IR Chingtok, PPC, PSC aser LTSU nungi shilem agia liasü aser DC office, Medical, Education, BGHSS, Yingli College aser Phomla Hoichem nungi tetsürtemia shilem agia liasü.

Tongti tesemdangeri

exhibition stall semzükja sendang aser DEF Longleng ajanga beating of retreat agia sentong tembang.

## MON:

Mon nung 75th Republic Day sentong ya Local Ground, Mon nung agia liasü, aser tongti tesemdanger Minister, Housing & Mechanical Engineering, P. Bashangmongba Chang liasü.

Tongti tesemdangeri National Flag salar parade contingents ti - 6th NAP BN Tizit; DEF Mon; VG; Ex - Servicemen; NCC Wangkhao Govt. College; Bharat Scout and Guides, Don Bosco School; Govt. Higher Secondary School (D) aser 6th NAP BN Pipe Band nungi Rashtriya Salute agia liasü.

Iba sentong nung Yangman Konyak-i temeja ken ka aten, Atzing K Naga, ABC & Wangchem Konyak nungeria ken ka aten, Mon Vale College Students ajanga tsüngsang ka agi shilem agi, GHSS Mon aser Women Cultural Troupe, Mopong Hongkong Union, Mon Town ajanga sobaliba tsüngsang ka ajanga shilem agia liasü.

## NIULAND:

Niuland town nung 75th Republic Day nungtem nung sentong ka ayongzüka liasü, kong tongti tesemdanger Advisor, Industries & Commerce, Hekani Jakhalu liasü.

Iba sentong nung tongti tesemdangeri National Flag salatsüba den külemi Rashtriya salute agia liasü. Iba sentong nung Imotemjen Jamir, Dy. S.P. Niuland lenisüba kübok parade contingents pungo liasü.

Iba sülen Advisor-i exhibition stall tem semzüktsü. Iba sentong nung InSync Taekwondo Academy ajanga parnok sempet sayuba den 7AR ajanga Band display sayu aser New Showuba aser Suhoi Village nungi sobaliba tsüngsang tem agi shilem agia benjong tali longsodaktsü.

# Alabama nung nitrogen gas amshia nisung ka tepset

**Washington, Aenjeti/January 26 (Agencies):** Brehostibarnü Alabama state nung nitrogen gas amshia nisung ka tepsetogo, aser ibai US nung nitrogen gas amshia nisung tepsettsü temerenshi agütsüba mezüngbuba alitsü, koba UN-ibo reshikangshiba den sako ta ashir.

1988 küm nisung ka tepsetba mechi 1996 küm obendang nung tasüba temerenshi agütsüsang Kenneth Eugene Smith ya Hokulbarnep 7:55 nung süogo ta sangdong. Arishi küm 58 tain Smith dak temang nung iba miim mozü khaloktsür minute 25 shi lir asü, ta ashir.

"Alabama nung metendangba, kuli makaba temerenshi yimya amshir," ta Robin Maher, executive director of the Death Penalty Information Center ajanga ashi.

"Asenoki metet tashinung iba ya United States mesüra alima nung nisung tepsetba nung amshia mali. Alabama ketdangsurtem densema shingai kechi ataloktsüar memetet," ta Maher-i osangbener dang ashi.

Smith ya 2022 küm November ita südaktsütsü merang, saka tepuokdak ketdangsur temi iba miim tuloktsütsü atema tezü mongutet.

December ita National Public Radio den sensaksemba mapang, Smith-i pa tepsettsü aliba atema kanga tsübor aser taoba mapang tepsettsü

merangba nung tamakok ajuruba ajanga tang tashi tekolok nung timtem lir, ta shia liasü.

"Ni tim atemtsü ta nisung ajaki ashir," ta pai shia liasü.

US nung gas amshia tatemsa nisung tepsetba ya 1999 küm nisung tepseter ka hydrogen cyanide gas inoker südaktsüba liasü.

2023 küm Unites States nung nisung 24 nem tasüba temerenshi agütsü aser parnok ajak dak temang nung miim tulokja liasü.

United State nung tasüba temerenshi agütsütsü asoshi nitrogen hypoxia amshitsü ya Alabama, Oklahoma aser Mississippi nung agizüka lir.

Geneva nung aliba UN rights office indang odongtar Ravina Shamdasani-i taoba hopta Alabama dang iba yimya nung Smith metepsettsü ajungshia liasü.

United States nung nisung tepsetba nung kodanga nitrogen gas ya mamshi saka shiruru tepsetba nungbo khen-khenbo amshia aru.

Ajisüaka American Veterinary Medical Association-ia shiruru tulu iba yimya nung tepsetba mapang sedative amshitsü shia lir, ta Shamdasani-i ashi.

Alabama nung nitrogen asphyxiation amshia nisung tepsettsü atema ozüng nung sedation (sümanga odaktsüba) amshitsü shia mali.

Alabama state-i iba yimya amshia nisung tepsetba bhukumer aser ibai nisung tepsettsü yimta tajungtiba lir, ta ashir.

1988 küm Elizabeth Sennett tepsetba nung Smith aser John Parker aitsü. Tenaprong nem Sennett tepsetba atema sen \$1,000 agüja liasü.

Charles Sennett-i pa kinungtsü tepsettsü tasa yanglu aser la sür hopta ka lir pa pasasa tepset. Parker ya 2010 küm temang nung miim mozü khalokja südaktsü.

Smith-i US Supreme Court dang pa tepsettsü aliba soita atatsü mepishia liasü saka linük nung tematiba court-i Bodhbarnü iba temepishiba magizük.

US kübok states 23 nung tasüba temerenshi agienogo aser ano Arizona, California, Ohio, Oregon, Pennsylvania aser Tennessee states tem nung governor temi iba temerenshi mamshidaktsü soita lir.

Arishi küm 45 tain Elizabeth Sennett dak 'fireplace implement' agi azük aser teku aser tekong nung atsüng aser la ya nisung kari ki rakpoka auyatsü merang dang tepsetba ama tasa yanglua liasü.

La kinungbi Charles Sennett ya sentsüh agi tsübanger aliba sayutsüngir ka liasü aser pai insurance sen agitsü mechi pa kinungtsü tepsettsü tasa ya yanglu.

## ALI AYOKER

**AT AOYIMKUM**

Rs. 250 per sq. feet

Two minutes walk from

Futsal ground, Indisen

Contact: 9856 278136



## Secretariat XI & DC XI na football exhibition match ka asaya



**Dimapur, Aenjeti/January 26 (TYO):** January 26 nü Secretariat Plaza nung 75buba Republic Day amungba nung shilem ka ama Secretariat XI aser DC XI na tsüngda football exhibition match ka asayaogo. Iba sentong nung Home Commissioner, Abhijit Sinha, IAS alakteta jaoker liasü.

Asaya nung Secretariat XI-i kanga kara asaya tenzük aser parnoki mezüngbuba goal idaktsütsü asoshi maongka ngua liasü aser kasa mapang nung Secretariat XI GK-i ball kanga junga nokdanga DC XI

nem goal magütsüdaktsü. Team ana tsüngda kanga toktepa asayaba sülen DC XI nungi asayar Kuolietuo Kets-i mezüngbuba goal idakja liasü.

Asaya tanabuba shilem nung team anapronglai goal idaktsütsü asoshi maongka kangabo monguteti asaya. Secretariat XI puri goal idaktsütsü asoshi kanga merangdanga asayaba mapang meyiper DC XI nungi asayar Peteneizo Kire-i tanabuba goal idakja liasü. Asaya nung Secretariat XI atema Theja Peseyi-ia goal ka idaktsü saka DC XI-i asaya 2-

1 agi koka liasü.

Iba anogo sentong ya "Beating the Retreat" ceremony agir tembang koba Republic Day sentong tembangba temaitsü lir. NPTS Brass Band aser 13th Assam Rifles Bn Pipe Band-i shilem tajung agia lokti peladakja liasü. Band ana yagi balala shilem agiba sülen ajak meyokteper "Abide with me" kensü tema wako atsüzüka yur sentong tembanga liasü.

Home Commissioner, Abhijit Sinha-i, Parade aser Exhibition Stall takokertem nem sempet agüja liasü.

## Australian Open 2024: Sinner-i Djokovic koka Final-i iogo

**Aenjeti/January 26, 2024 (Agencies):** Taküm asoshi mezüngbuba Grand Slam Australian Open nung Hokolbarnü Jannik Sinner-i Novak Djokovic koka final tongtetogo.

Melbourne Park nung Djokovic asaya 33 tashi khien danga tamakok mongui asaya aliba Sinner-i tembangtsüogo.

Semifinal asaya nung Italy nung asayar yagi kanga junga asaya aser pai Djokovic amokbanger asaya-a asaya 6-1, 6-2, 6-7 (6/8), 6-3 agi kokogo. Pa tang mezüngbuba Grand Slam final kati iogo.

2018 küm sülen Djokovic tang mezüngbuba Australian Open nung tamakok nguogo aser pai otsüsütsüsa Grand Slam 25buba akoktsü timla aliba Sinner-i nokdangogo.

Arishi küm 22 tain Italy

nung asayar yagi tetenzük nungi Djokovic kanga nongshia asaya aser ibayongji Djokovic-i mezüngbuba set ana nung unforced error 29 tashi mena liasü, koba pa memesük liasü. Kasa mapang nung sinner-ibo unforced error 8 dang mena liasü.

"Asaya kanga toktepa asayaogo. Ni kanga junga asaya tenzük. Pa mezüngbuba set ana nung aibelen kanga mena. Pai junga masayateter ama bilem anungji ni pa nongshia asaya," ta Sinner-i ashi.

Arishi küm 36 tain asayar yagi taoba mapang ama jung masayateter aser kasa mapang nung Sinner-i pa world No.1 asayar den asayar ta kecha mebilemi kanga süngjema asaya aser pa 3-0 agi tejakdang aküm.

Italy nung asayar yagi ano

game trokbuba nung serve ka break asü aser mezüngbuba set akok.

Tanabuba set nunga Djokovic-i maneni aibelen kanga mena aser Sinner-i game tasembuba nung serve break asü. Djokovic-i asaya repringertem dang pa pusemstsü mepeshi saka Sinner-i tanaben pa indang serve break süa tanabuba set kokatok.

Tasembuba set nungbo asayar anapronglai pei service break mesüdaktsü asaya aser tie-break asayaba sülen Djokovic-i 6-7 (6/8) agi asaya koka liasü.

Ajisüaka set pezübuba nunga Sinner-i Djokovic indang service ka break süa pa 3-1 agi tejakdang aküm aser pa indang service khien danga break mesüdaktsü asaya koka liasü.

## Nagaland Angh-i Department...

Department of Fisheries and Aquatics Resources-ango amshia yangluba chiyongtsü aser ango takum ayok, Department of Animals Husbandry and Veterinary Services ajanga Milk Cooperative of Nagaland (MILKCON) product tem sayu aser ayok.

Department of Cooperation ajanga azüngket, ninang mojitzü, turmeric, Naga nung mersü, Szechuan pepper aser süng

agi yangluba marok-enrok yoka liasü.

Nagaland State Disaster Management Authority ajanga district headquarters ajunga indang 3D digital hazard mapping sayua liasü.

Department of Horticulture ajanga PMKSY aser MIDH schemes kübok organic oranges, aonsotsü, konger amala sayu aser ayok. Parnokisa Shitake konger balaka sayu aser ayok.

Department of Agriculture

ajanga jang tabu balala aser commercial value products tem sayua liasü.

Department of Health and Family Welfare ajanga livestyle diseases atema angati temang repringa liasü.

Iba sentong nung Department of Health & Family Welfare ya Exhibition winner sangdong, Horticulture aser Information & Public Relations Department nem tanabuba aser tasembuba jenjang agüja liasü.

(Tapak 2 nungi...)

## 2027 World Test Championship final England nung asayatsü

**Mimbai, Aenjeti/January 26 (Agencies):** 2027 World Test Championship final England nung June it asayatsü. 2021 küm mezüngbuba WTC final Southampton nung asayaba sülen tang agi pezübenbuba iba asayamung final England nung asayatsü lir.

Hokolbarnü International Cricket Council (ICC)-i, 2024 nungi 2027 atema ICC asoshi Social Responsibility Provider atema Request for Proposal (RFP) ka agütsüogo, kong ICC-i asayamung ayongzüka agitsü aliba linük aser mapang indang shisema lir.

WTC final nung küm anabuba tamakok anguba sülen India captain Rohit Sharma-i, final ya England nung dang masü tanga tesem nunga asayatsüla aser June ita dang asayatsüa kecha nungdaka madoker, ta ashi. "Kechiba IPL sülen asayar? Kechi March ita masayateter? Final asayatsü asoshi June ita kija masü. Final ya mashi mapang ka nung mashi

tesem ka nung asayatsü," ta Rohit-i ashi.

Alima ajunga nung küm tepeyong T20 league balala asayaba ajanga June ita dak alaker tanga ita ka shimtsü asoshi ICC atema tebilemstsü lir.

Kasa mapang nung ICC-i Women's T20 Champions Trophy tenzüktsü asoshi telemtetba agiogo aser mezüngbuba asayamung ya 2027 küm February ita Sri Lanka nung asayatsü. Tebur Champions Trophy maneni ODI format nung asayatsü aser 2025 küm February ita Pakistan nung asayatsü.

Kasa mapang nung Malaysia, koba associate nation ka lir, iba linük nung women's Under-19 World Cup tanabuba 2025 küm January ita asayatsü. India nung 2025 küm October/November ita tetsür World Cup ayongzüka asayatsü aser 2026 küm October/November ita Sri Lanka den külemi tebur T20 World Cup ayongzüka asayatsü.

## Season tembangba sülen Klopp-i Liverpool toktsütsü



**Aenjeti/January 26, 2024 (Agencies):** Jurgen Klopp-i, season tembangba sülen pai Liverpool manager mapa toktsütsü ta sangdongogo aser ashiba agi, pa tashi mali kümogo.

"Iba osang ya mezüng angashidangbo nisung aika asoshi taoksatsüka asütsü ta ni meteta lir," ta Klopp-i Hokolbarnü ashi.

"Ni club, yimti, club pusemertem, team, staff aser iba club dak sendaka aliba ajak kanga meimer," ta arishi küm 56 tain yagi ashi, shiba 2015 küm Liverpool nung dena liasü.

"Item ajakiji liaka ni iba telemtetba agiba ajanga iba telemtetba ya agitsüla ta jangja kümdaktsür. Ni tashi mali kümogo," ta pai ashi.

Klopp shiba lenisüba nung Liverpool pur Bodhbarnü League Cup final-i iogo, pai pa Anfield nung küm ti sür tesadang inyakogo aser season

tembangba sülen club toktsütsü ta club kiburtem nem osang agütsüogo.

Germany nung coach ya Liverpool nung 2015 küm October ita aden aser pa lenisüba nung club-i Champions League, Premier League, Club World Cup, FA Cup, League Cup aser Super Cup aser iba den Community Shield dena kokogo.

"Onoki mapang tapet ka nung pa nem tetushi agütsütsü, aser club kibur ama pa shimba ya ajak dang temoatsü tulutiba rongnung ka lir," ta tir Fenway Sports Group tir Mike Gordon-i ashi.

Liverpool nung maden tsüngda Klopp ya German football club Borussia Dortmund indang manager liasü, kong pai 2011 aser 2012 küm atonga Bundesliga kokogo.

Pa lenisüba nung 2013 küm Dortmund pur Champions League final-i ai ajisüaka parnoki Bayern Munich makok.

## BILEMDANGANG

"Anogoshia langka tasen angazüktsü merangang."